


1779
1787
1791




東坡集卷之二十二

表

密州謝上表

臣軾言昨奉勅差知密州軍州事已於今月三日到任上訖草芥
 賤微敢干洪造乾坤廣大曲遂私誠受命撫躬已自知於不稱人
 境問俗又復過於所期臣軾中謝伏念臣家世至寒性資甚下學
 雖篤志本先朝進士篆刻之文論不適時皆老生常談陳腐之說
 分於聖世處以散材一自離去闕庭屢更歲籥塵埃筆硯漸忘舊
 學之淵源奔走簿書粗識小人之情偽欲自試於民社庶有助於



涓埃以爲公朝不廢私願攜孳上國預憂桂玉之不充請郡東方
實欲弟昆之相近自惟何幸動獲所求雖父兄所以處臣其僥倖
不過如此雖云疎外有此遭逢此蓋伏遇皇帝陛下躬上聖之資
建太平之業以爲人無賢愚皆有可用故雖如臣等輩猶未盡捐
臣敢不仰仰至恩益堅素守推廣中和之政撫綏疲瘵之民要使
民之安臣則爲臣之報國臣無任瞻天荷聖激切屏營之至

徐州謝上表

臣軾言分符高密已竊名邦改命東徐復塵督府荷恩深厚撫已
兢慙臣軾中謝伏念臣在身農畝託迹書林信道直前曾無坎井

之避立朝寡助誰爲先後之容向者屢獻瞽言仰塵聖鑒豈有意
於爲異蓋篤信其所聞顧慙迂闊之言雖多而無益惟有朴忠之
素旣久而猶堅遠不忘君未忍改其常度言之無罪實深恃於至
仁知臣者謂臣愛君不知臣者謂臣多事空懷此意誰復見明伏
惟皇帝陛下日月照臨乾坤覆燾察孤危之易毀諒拙直之無他
安全陋軀畀付善地民淳訟簡殊無施設之方食足身閑仰愧生
成之賜顧力報之無所懷孤忠而自憐

徐州謝獎諭表

臣軾言伏奉今月四日勅以臣去歲修城捍水粗免疎虞特賜獎

諭者奔走服勤人臣之常事褒稱勞勉學者之至榮自惟何人乃辱斯語臣軾誠惶誠恐稽首頓首伏念臣學無師法才與世疎經術既已不深吏事又其所短累忝優寄卒無異稱寬如定遠之言平平無取拙比道州之政下下宜然乃者河決澶淵毒流淮泗百堵皆作蓋僚吏之劬勞三板不沈本朝廷之威德而臣下掠衆美上貪天功獨竊璽書之榮以爲私室之寶此蓋伏遇皇帝陛下天覆四海子養萬民哀無辜之遭懼特遣使以存問旣蠲免其賦調又飲食其飢寒所以錄臣之微勞蓋將責臣之來效臣敢不躬親畚築益脩今歲之防安集流亡盡復平時之業庶殫朽鈍少補絲毫臣無任

徐州賀河平表

臣軾言竊聞黃河決口已遂閉塞者聖謨獨運天眷莫違庶邦子來民罔告病萬杵雷動役不逾時遂消東北莫大之憂然後麥禾可得而食人無後患喜若再生臣軾中謝伏以大河爲災歷世所病禹治兗州之野十有三載乃同漢築宣防之宮二十餘年而定未有收狂瀾於旣潰復故道於將墮俛仰而成神速若此恭惟皇帝陛下至仁博施神智無方達四聰以來衆言廣大孝以安宗廟水當潤下河不溢流屬歲久之無虞故患生於所忽方其決也本

東坡集卷三十三
吏失其防而非天意及其復也蓋天助有德而非人功振古所無
溥天同慶維豐沛之大澤實沛泗之所鍾伊昔橫流凜孤城之若
塊迨茲平定蔚秋稼以如雲害既廣則利多憂獨深而喜倍雖官
守有限不獲趨外庭以稱觴而民意所同亦能抒下情而作頌臣
無任

湖州謝上表

臣軾言蒙恩就移前件差遣已於今日二十日到任上訖者風俗
阜安在東南號爲無事山水清遠本朝廷所以優賢顧惟何人亦
與茲選臣軾中謝伏念臣性資頑鄙名迹堙微議論濶疎文學淺

陋凡人必有一得而臣獨無寸長荷先帝之誤恩擢寘三館蒙陛
下之過聽付以兩州非不欲痛自激昂少酬恩造而才分所局有
過無功法令具存雖勤何補罪固多矣臣猶知之夫何越次之名
邦更許借資而顯受顧惟無狀豈不知恩此蓋伏遇皇帝陛下天
覆羣生海涵萬族用人不求其備嘉善而矜不能知其愚不適時
難以追陪新進察其老不生事或能牧養小民而臣頃在錢塘樂
其風土魚鳥之性旣自得於江湖吳越之人亦安臣之教令敢不
奉法勤職息訟平刑上以廣朝廷之仁下以慰父老之望臣無任
到黃州謝表

臣軾言去歲十二月二十九日準勅責授臣檢校尚書水部員外郎充黃州團練副使本州安置不得僉書公事臣已於今日到本所訖者狂愚冒犯固有常刑仁聖矜憐特從輕典赦其必死許以自新祇服訓辭惟知感涕

中謝

伏念臣早緣科第誤忝縉紳

親逢睿哲之興遂有功名之意亦嘗召對便殿考其所學之言試守三州觀其所行之實而臣用意過當日趨於迷賦命衰窮天奪其魄叛逆義理辜負恩私茫如醉夢之中不知言語之出雖至仁屢赦而衆議不容案罪責情固宜伏斧鑕於兩觀推恩屈法猶當禦魑魅於三危豈謂尚玷散員更叨善地投畀磨厲之野保全樛

櫟之生臣雖至愚豈不知幸此蓋伏過百帝陛下德刑並用善惡兼容欲使法行而知恩是用小懲而大誡天地能覆載之而不能容之於度外父母能生育之而不能出之於死中伏惟此恩何以爲報惟當蔬食沒齒杜門思愆深悟積年之非永爲多士之戒貪戀聖世不敢殺身庶幾餘生未爲棄物若獲盡力鞭筆之下必將捐軀矢石之間指大誓心有死無易臣無任

謝徐州失覺察妖賊放罪表

臣軾言去年十二月十五日准淮南轉運司牒奉聖旨差官取勘臣前任知徐州日不覺察百姓李鐸郭進等謀反事臣尋具析在

任日曾選差沂州百姓程棐令緝捕凶逆賊人致棐告獲前件妖
賊因依乞勘會施行至今年七月二日復准轉運司牒坐准尚書
刑部牒奉聖旨蘇軾送尚書刑部更不取勘盜發所臨守臣固當
重責罪疑則赦聖主所以廣恩自驚廢逐之餘猶在愍憐之數臣
軾誠惶誠恐頓首頓首伏念臣早蒙殊遇擢領大邦上不能以道
化民達忠孝於所部下不能以刑齊物消奸宄於未萌致使妄庸
敢圖僭逆原其不職夫豈勝誅况茲溝瀆之中重遇雷霆之譴無
官可削撫已知危至於捕斬羣盜之功乃是鄰近一夫之力靖言
其始偶出於臣雖爲國督奸常懷此志而因人成事豈足言勞勉
自效於涓埃庶少寬於斧鉞豈謂蕩然之澤許以勿推收驚魄於
散亡假餘生之晷刻退思所自爲幸何多此蓋伏遇皇帝陛下舞
虞舜之干示人不殺祝成湯之網與物求生其間用刑本不得已
稍有可赦無不從寬務在考實而原情何嘗記過而忘善益悟向
時之所坐皆是微臣之自貶感愧終身論報無地布衣蔬食或未
死於飢寒石心木腸誓不忘於忠義臣無任

謝量移汝州表

臣軾言伏奉正月二十五日詔命特授臣汝州團練副使本州安
置不得僉書公事者稍從內遷示不終棄罪已甘於萬死恩實出

於再生祇服訓詞惟知感涕臣軾誠惶誠恐頓首頓首伏念臣向者名過其實食浮於人兄弟並竊於賢科衣冠或以爲盛事旋從冊府出領郡符既無片善可紀於絲毫而以重罪當膏於斧鉞雖蒙恩貸有愧平生隻影自憐命寄江湖之上驚魂未定夢遊縲紲之中憔悴非人章狂失志妻孥之所竊笑親友至於絕交疾病連年人皆相傳爲已死飢寒併日臣亦自厭其餘生豈謂草芥之賤微尚煩朝廷之紀錄開其惻悔許以甄收此蓋伏遇皇帝陛下湯德日新堯仁天覆建原廟以安祖考正六宮而修典刑百廢具興多士爰集彈冠結綬共欣千載之逢掩面向隅不忍一夫之泣故推涓滴以及焦枯顧惟效死之無門殺身何益更欲呼天而自刎尚口乃窮徒有此心期於異日臣無任

乞常州居住表

臣軾言臣聞聖人之行法也如雷霆之震草木威怒雖甚而歸於欲其生人主之罪人也如父母之譴子孫鞭撻雖嚴而不忍致之死臣漂流棄物枯槁餘生泣血書詞呼天請命願回日月之照一明葵藿之心此言朝聞夕死無憾臣軾誠惶誠恐頓首頓首臣昔者嘗對便殿親聞德音似蒙聖知不在人後而狂狷妄發上負恩私既有司皆以爲可誅雖明主不得而獨赦一從吏議坐廢五年

積憂薰心驚齒髮之先變抱恨刻骨傷皮肉之僅存近者蒙恩量
移汝州伏讀訓詞有人材實難弗忍終棄之語豈獨知免於縲紲
亦將有望於桑榆但未死亡終見天日豈敢復以遲暮爲歎更生
僥覲之心但以祿廩久空衣食不繼累重道遠不免舟行自離黃
州風濤驚恐舉家重病一子喪亡今雖已至泗州而資用罄竭去
汝尚遠難於陸行無屋可居無田可食二十餘口不知所歸飢寒
之憂近在朝夕與其強顏忍恥干求於衆人不若歸命投誠控告
於君父臣有薄田在常州宜興縣粗給饘粥欲望聖慈許於常州
居住又恐罪戾至重未可聽從便安輒敘微勞庶蒙恩貸臣先任

徐州日以河水浸城幾至淪陷臣日夜守捍偶獲安全曾蒙朝廷
降勅獎諭又嘗選用沂州百姓程棐令購捕凶黨致獲謀反妖賊
李鐸郭進等一十七人亦蒙聖恩保明放罪皆臣子之常分無涓
埃之可言冒昧自陳出於窮迫庶幾因緣僥倖功過相除稍出羈
囚得從所便垂念臣受性剛褊賦命奇窮既獲罪於天又無助於
下怨仇交積罪惡橫生羣言或起於愛憎孤忠遂陷於疑似中雖
無愧不敢自明向非人主獨賜保全則臣之微生豈有今日伏惟
皇帝陛下聖神天縱文武生知得天下之英才已全三樂躋斯民
於仁壽不棄一夫勃然中興可謂盡善而臣抱百年之永嘆悼一

東坡集卷三十一
飽之無時貧病交攻死生莫保雖鳧雁飛集何足計於江湖而犬馬益惟猶有求於君父敢祈仁聖少賜矜憐臣見一面前去至南京以來聽候朝旨干冒天威臣無任

到常州謝表二首

臣軾言先蒙恩授汝州團練副使本州安置尋上表乞於常州居住奉聖旨依所乞臣已於今月二十二日到常州訖者積累難磨未經洗滌至仁易感許即便安祇荷寵靈惟知感涕中謝伏念臣

所犯罪戾本合誅夷向非先帝之至明豈有餘生於今日銜恩未報有志不從已分沒身寄殘骸於魍魅敢期擇地收暮景於桑榆

此蓋伏遇皇帝陛下仁孝生知聰明天縱寅奉上帝之命述修內聖之成謀念此菅蒯之微庶幾簪履之舊俾安田畝稍出縲囚飽食無思但日陶於新化杜門自省當益念於往愆臣無任

二

臣軾言先蒙恩授汝州團練副使本州安置尋上表乞於常州居住奉聖旨依所乞臣已於今月二十一日到常州訖者罪大人微自甘永棄食貧口衆未免求安忽奉命旨出於獨斷仰銜恩施不覺涕零中謝伏念臣猥以凡材早塵仕籍生逢有作之聖獨抱不

移之愚廢棄六年已忘形於田野泝泐萬里偶脫命於江潭豈謂

此生得從所便此蓋伏遇太皇太后陛下厚德載物至仁代天春
生秋成本無心於草木風行雷動自有信於蟲魚致此幽頑亦叨
恩宥耕田鑿井得漸齒於平民碎首刳肝尚未知其死所臣無任

登州謝上表二首

臣軾言伏奉告命授臣朝奉郎知登州軍州事臣已於今月十五
日到任上訖者登雖小郡地號極邊自驚縲絏之餘忽有民社之
寄拜恩不次隕涕何言

中謝

臣聞臣不密則失身而臣無周身之
智人不可以無學而臣有不學之愚積此兩愆本當萬死坐受六

年之滴甘如五鼎之珍擊鼓登聞止求自便買田陽羨誓畢此生

豈期枯朽之中有此遭逢之異收召魂魄復爲平人洗濯瑕玼盡
還舊物此蓋伏遇皇帝陛下內行曾閔之孝外發禹湯之仁日將
旦而四海明天方春而萬物作於其黨而觀過謂臣或出於愛君
就所短而求長知臣稍習于治郡致茲異寵驟及非才恭惟先帝
全臣於衆怒必死之中陛下起臣於散官永棄之地沒身難報碎
首爲期臣無任

二

臣軾言伏奉告命授臣朝奉郎知登州軍州事臣已於今月十五
日到任上訖者寵命過優訓詞尤厚非臣愚蠢所克承當臣軾誠

惶誠恐頓首頓首臣所領州下臨漲海人淳事簡地瘠民貧入境
問農首見父老載白扶杖爭來馬前皆云枯朽之餘死亡無日雖
在田野亦有識知恭聞聖母至明而慈嗣皇至仁而孝每下號令
人皆涕流願忍垂死之年以待維新之政言雖甚拙意則可知見
朝廷擢臣於久廢之中謂臣愚必有以少塞其責或能推廣上意
惠康小民而臣天資鈍頑學問寡淺心已耗於多難才不周其一
身將何以上荅聖知下慰民願伏惟太皇太后陛下以任嬖之位
行堯舜之仁勤邦儉家永爲百王之令典時使薄歛故得萬國之
歡心豈煩燭火之微更助日月之照且知奉法不敢求各臣無

辭免起居舍人狀二首

右軾准閣門告報已降告命除臣依前官守起居舍人者臣受材
淺薄臨事迂疎起於罪廢之中未有絲毫之效驟陞清職必致煩
言願同虛授之恩庶免素餐之愧所有告身不敢祇受

二

右臣近奉乞辭免起居舍人恩命准尚書省劄子奉聖旨不許辭
免者天威在顏不違咫尺命於子惟所東西況茲久廢之餘敢
有不同之意伏念臣受性褊狃賦命奇窮既早竊於賢科復濫登
於冊府多取天下之公器又處衆人之所爭若此而全從來未有

今者出於九死之地始有再生之心危迹粗安驚魂未返若驟應
非分之寵恐別生意外之憂縱無人災必有鬼責伏望聖慈廓天
地包函之量推父母愛憐之心知其實出於至誠止欲自處於無
過追還新命更選異材使之識分以安身孰與包羞而冒寵再伸
微懇伏俟重誅所有告身臣不敢祗受

辭免中書舍人狀

右臣准閣門告報已降告命除臣軾中書舍人者伏念臣頃自貶
所起知登州到州五日而召以省郎到省半月而擢爲右史欲自
勉強少辭恩私而才無他長職有常守出入禁闥三月有餘考論
事功一毫無取今又冒榮直授躡衆驟遷非次之陞既難以處不
試而用尤非所安願回異恩免速官謗所有告身臣不敢祗受

謝中書舍人表二首

臣軾言伏奉制命授臣試中書舍人仍改賜章服者右史記言已
塵高選西垣視章復玷近班皆儒者之至榮豈平生之所望臣軾
誠感誠懼頓首頓首竊以詞命之職古今所難非獨取之於文蓋
將試之以事至於機務亦或與聞雖四戶擅權非當時之公議而
五花判事亦前代之美談及夫三字之除乃是一切之政但謂內
朝之法從安知宰相之屬官旣任止於訓詞故權移於胥史恬不

知怪習爲故常先皇帝道冠百王法垂萬世建六官而修故事闢
三省以待異人典章一新名實皆正遂申明於四禁俾分領於六
曹遠則追直閣之司近則通檢正之任雖未聞政而聞事蓋須有
德而有言如臣之愚無一而可草創潤色旣非鄭國之材除書德
音又乏唐人之譽忽當此選莫測其由此蓋伏遇皇帝陛下將聖
與仁能哲而惠雖在三年不言之際已有十日竝照之光而臣日
侍邇英親聞訪道仰天威之甚近知聖鑒之難逃謂臣嘗受先朝
之知實無左右之助棄瑕往昔責效將來臣敢不益勵素心無忘
舊學上體周公煩悉之誥助成漢家深厚之文苟無曠官其敢言

報臣無任

二

臣軾言伏奉制命授臣試中書舍人仍改賜章服者聖神獨斷出
成命於省中衰病增光溢虛名於朝右訓詞之重士論所榮臣軾
誠感誠懼頓首頓首臣聞有言逆心此古人所以顛沛積毀消骨
非聖主莫能保全臣本受知於裕陵亦嘗見待以國士嘉其好直
許以能文雖竄謫流離之餘決無可用而哀憐收拾之意終不少
衰抱弓劍以長號分簪履之永棄豈期晚遇又過初心矧外制之
深嚴極西垣之清要在唐之盛以馬周岑文本爲得人近世所傳

有楊億歐陽修之故事不試而用于今幾人遂超同列之先遠繼前修之末夫何頑鈍有此遭逢此蓋伏遇太皇太后陛下憂國忘家愛民如子憂深故任其事者重愛極故爲之慮也長敷求哲人以遺嗣聖所以兼收而並用庶幾有得於其間臣敢不盡其所能期於無愧始終自誓故常以道而事君夷嶮不同則必見危而授命臣無任

辭免翰林學士狀二首

右臣准閣門告報已降告命除臣翰林學士知制誥者臣竊謂自從西掖直遷內制雖祖宗故事而近歲以來少有此比非高材重德雅望不在此選臣自量三者皆不迫人驟當殊擢實不自安伏望聖慈察臣至誠非苟辭避一追還異恩以厭公論謹錄奏

二

右臣近者奏乞辭免翰林學士知制誥恩命伏蒙降詔不允者天地之恩義無所謝父母之訓理不可違而臣至愚尚守所見再傾微懇不避重誅非獨以學問荒唐文詞鄙淺已試無效如前所陳實以勞舊尚多必有積薪之誚兄弟進豈無連茹之嫌誠不自安非敢矯飾伏望聖慈亮其悃悞特許追還庶免人言俾得自效所有告命臣不敢祇受謹錄奏聞

謝宣召入院狀二首

右臣今日西頭供奉官充待詔董士隆至臣所居奉宣聖旨召
 臣入院充學士者詔語春深再命而僕使華天降一節以趨在故
 事以嘗聞豈平生之敢望省循非稱愧汗交深竊以視草之官自
 唐為盛雖職親事祕號為北門學士之榮而祿薄地寒至有京兆
 掾曹之請豈如聖代一振儒風非徒好爵之糜兼享大烹之養玉
 堂賜篆仰淳化之彌文寶帶重金佩元豐之新渥既厚其禮愈難
 其人而臣以空疎冗散之材衰病流離之後生還萬里坐閱三遷
 不緣左右之容蠶處賢豪之上此蓋伏遇皇帝陛下生資文武天

昨聖神雖亮陰不言尚隱高宗之德而訪落求助已啓成王之心
 首擇輔臣次求法從知人材之難得采虛名而用臣敢不益勵初
 心力圖後効才不逮古雖慙內相之名志常在民庶免私人之誚
 臣無任

二

右臣今日西頭供奉官充待詔董士隆至臣所居奉宣聖旨召
 臣入院充學士者里巷傳呼親臨詔使私庭望拜恭被德音人言
 稽古之榮臣有素餐之愧懇詞雖至成命莫回伏以朝論所高禁林
 為重非徒翰墨之選乃是將相之儲禮絕同僚歎裴李於座上功

成異域得頗牧於禁中宜有異人來膺此選而臣顛愚自信狂直
不問先帝憐其孤忠欲召而未果陛下出於獨斷決用而無疑會
未周歲而闕三官試以百爲而無一可保全已幸擢用何名此蓋
伏遇太皇太后陛下德協天人心存社稷受聖子之託天下抱神
孫而朝諸侯巍巍其有成功不見治迹斷斷而無他技專用老成
推其類以及臣顧何能而在此忠義之報死生不移臣無任

謝翰林學士表二首

臣軾言蒙恩除臣翰林學士知制誥者名微不稱寵至若驚伏念
臣經術空疎吏能短淺少年自守無用於作新去國生還適逢於
求舊初何云補遺辱竝收此蓋伏遇皇帝陛下文武生知聰明天
縱法乾坤之廣運體日月之照微過採虛名使陳薄技敢不激昂
晚節砥礪初心雖洪造之難酬盡微生而後已臣無任

二

臣軾言蒙恩除臣翰林學士知制誥者寵光逾分榮愧交中伏念
臣本以疎愚起於遐陋學雖篤志皆場屋之空文言不適時豈朝
廷之通論老於憂患望絕縉紳此蓋伏遇太皇太后陛下總覽政
綱灼知治體恢復祖宗之舊兼收文武之資過錄愚忠以敦薄俗
敢不臨寵而懼職思其憂非敢有意於功名庶幾少逃於罪悔臣

無任

謝對衣金帶馬表二首

臣軾言伏蒙聖慈以臣入院特賜衣一對金腰帶一條金鍍銀鞍

轡馬一疋被三品之服章君子所以昭令德分六閑之駟駿朝廷

所以旌有功顧惟何人亦與茲寵拜恩俯僕流汗交并臣軾

中謝

伏念臣人微地寒性迂才短襲布韋而自薦偶忝縉紳駕款段以

言歸終安畎畝豈謂便蕃之錫萃於衰病之軀此蓋伏遇皇帝陛

下總覽衆工財成大化至誠樂與有緇衣之好賢後民用章無白

綯於空谷不羶寒陋亦被光華攬佩以思遂識斷金之義舉便自

誓敢忘希驥之心臣無任

二

臣軾言伏蒙聖慈以臣入院特賜衣一對金腰帶一條金鍍銀鞍

轡馬一疋命服出笥榮動摺紳左驂在廷光生徒馭德不稱物愧

無所容臣軾

中謝

伏念臣衰朽無功蠢愚不學已分鷓梁之刺敢

逃負乘之譏再惟此恩何自而至此蓋伏遇太皇太后陛下至神

廣運盛德兼容躬周公之勤勞而逸於委任寶老氏之慈儉而侈

於禮賢致此光榮下及微陋慨然攬轡敢有意於澄清束以立朝

尚可言於賓客臣無任

笏記二首

禁林之選多士所榮非獨文章之工俾專翰墨當屬典刑之老以重朝廷如臣空疎豈宜塵冒此蓋伏遇皇帝陛下剛健純粹緝熙光明曲搜已棄之材將建無窮之業顧慙淺陋將何補於盛明惟有朴忠誓不回於生死臣無任

二

西掖代言已愧一時之高選北門視草又忝諸生之極榮豈伊衰朽之餘有此遭逢之異此蓋伏遇太皇太后陛下坤元利正天造無私靡求備於一人將曲成於萬物文章小技縱有效於涓埃草木微生終難酬於雨露臣無任

辭免侍讀狀

右臣今月二十六日准閣門告報蒙恩除臣兼侍讀者入侍邇英其選至重非獨分摘章句實以仰備顧問臣學術淺陋恐非其人況臣待罪禁林初無吏責又加廩賜之厚益負尸素之憂伏望聖慈察其誠心追回新命以授能者謹錄奏聞伏候勅旨

謝除侍讀表二首

臣軾言今月一日蒙恩除臣兼侍讀者學術本疎老復加於謇訥官聯愈近職專在於討論退省其愚莫知所措

中射

伏以天威咫尺

尺顧末技以何施聖敬日躋豈羣臣之可望非張禹寬中之篤學
寂量懷素之懿文則何以奉天子五學之游求王人多聞之益如
臣愚暗何與選掄此蓋伏遇皇帝陛下卓然生知附以好學方高
宗恭默之後正宣帝勵精之初衆論僉陳悉洞照其情僞陳編一
覽已周知於廢興察臣衰病而無求庶可親近而寡過故茲拔用
驟及疲駑臣敢不溫故知新粗辦有司之職見危致命更輸異日
之忠臣無任

二

臣軾言今月一日蒙恩除臣兼侍讀者北門視草已叨儒者之極

榮西學上賢復玷侍臣之高選省循非稱愧汗交懷

中謫

竊惟講

讀之臣止以言語爲職考功課吏無殿最之可書陳善閉邪有膏
澤之潛潤豈臣愚陋亦所克堪此蓋伏遇太皇太后陛下憂思深
長德業久大受先帝投艱之託爲神孫經遠之謀故選左右前後
之人罔非吉士使知興亡治亂之效莫若多聞謂臣雖無大過人
之才知臣粗有不欺君之實故使朝夕與於討論奉永日之清閒
未知所報畢微生於盡瘁終致此心臣無任

謝賜御書詩表

臣軾言今月十五日賜宴東宮伏蒙聖恩差中使就賜臣御書詩

一首者玉笋金尊霈若雲天之澤寶章宸翰煥乎奎璧之文喜溢
心顏光生懷袖臣軾誠感誠懼頓首頓首伏念臣猥緣末技獲玷
清流早歲數奇已老江湖之上餘生何幸得依日月之光入侍燕
閒與聞講學卒桓榮之業因人而成登劉洎之牀則臣豈敢夫何
珍賜亦及微軀此蓋伏遇皇帝陛下道本生知才惟天縱文不數
於游夏書已遍於鍾王心慕乎追陋文皇之由學筆縱字大笑宋
武之未工知臣遭遇之難欲以顯榮其老鏤之金石庶傳玩於人
人付與子孫俾輸忠於世世臣無任

謝三伏早出表

臣軾言君逸臣勞固上下之分金伏火見亦消長之常乃緣異恩

而許夙退

中謝

伏念臣等誤緣末技待罪禁林戴星而朝雖粗輸

其勤拙窮日之力卒無補於絲毫遽蒙假借之私得遂委蛇之樂
此蓋伏遇太皇太后陛下嚴於恭已恕以馭臣事既省於清心口
自長於化國朝而不夕前追靜治之風伏當早歸下遂疎愚之性
臣無任

謝除龍圖閣學士表二首

臣軾言伏蒙聖恩以臣累章請郡特除臣龍圖閣學士知杭州者
中禁寶儲上應奎璧之象先朝謨訓遠同河洛之符隸職其間省

躬非據臣軾誠惶誠恐頓首頓首伏念臣學非有得愚至不移雖
叨過實之名卒無適用之器少時妄意蓋嘗有志於事功晚歲積
憂但欲歸安於田畝屬聖神之履運荷識拔之非常猶冀桑榆之
收遽迫犬馬之疾力求閒散庶免顛擠豈謂皇帝陛下聖度包荒
天慈委照察其才有所短不欲強置之禁嚴知其進不由人故特
保全其終始遂加此職以賁其行臣敢不仰緣末光益勵素守往
何適而不可中無愧之爲安但未死亡必期報塞臣無任感天荷
聖激切屏營之至

二

臣軾言伏蒙聖恩以臣累章請郡特除臣龍圖閣學士知杭州者
北扉清密久愧素餐內閣深嚴復膺殊寵以榮爲懼有覩在顏臣
軾誠惶誠恐頓首頓首伏念臣賦命數奇與人多悖遭遇仁祖忝
竊賢科繼蒙英廟之深知尤荷裕陵之見器而疏離沓此窮薄可
知晚親日月之光常恐餅壘之溢故求閒散以避災速豈謂太皇
太后陛下天高聽卑坤厚載物愛惜臣下固無異於子孫委任官
師本不分於中外致茲衰病不失清華然臣辭寵而益榮求閒而
得劇雖云稍遠於爭地尙恐終非其久安敢不磨鈍自修履冰知
戒庶全孤節少荅殊私臣無任

謝賜對衣金帶馬表二首

臣軾言伏蒙聖慈特賜衣一對金腰帶一條金鍍銀鞍轡一副馬一匹者出笥之珍已華朽質解驂之賜益耀衆觀顧惟何人亦被茲寵臣軾誠惶誠恐頓首頓首伏念臣少而拙訥老益踈愚山野之姿非文繡之所及疲駑之質雖鞭策以何加方祈冗散之安更忝便蕃之錫此蓋伏遇皇帝陛下緝熙儒術罔羅人材不愛車服寵數之章使爲吏民之美據鞍有愧束衽知榮敢不奉以牧民永思去害之指施之大臣庶無學製之傷臣無任

臣軾言伏蒙聖恩特賜衣一對金腰帶一條金鍍銀鞍轡一副馬

一匹者命服斯皇詩詠周宣之德康侯用錫易稱王母之仁惠澤所加臣工知勸臣軾誠惶誠恐頓首頓首伏念臣資材朽鈍學術空疎矧茲衰病之餘豈復光華之羨荷寵章之蕃庶人以爲榮顧形影之支離臣惟自愧此蓋伏遇太皇太后陛下知人堯哲徧物舜仁時遣拾遺補過之臣出爲承流宣化之任子衣安吉不待請而得之我馬虺隤蓋知勞而賜者敢不勉思忠盡務報恩勤永惟廐庫之珍莫非民力無忘獄市之寄以副上心臣無任

笏記一首

臣軾言隸職辰居承流閭寄自知衰朽有玷寵光此蓋伏遇皇帝
陛下總攬羣材靡遺片善曲收頑鈍俾處清華徒傾草木之心莫
報乾坤之施臣無任

二

既塵美職復玷名藩榮寵過情省循知愧此蓋伏遇太皇太后陛
下仁均動植明燭幽微特示寵章以旌眷遇恩勤莫報生死難忘
臣無任

杭州謝上表二首

臣軾言伏奉制書除臣龍圖閣學士知杭州臣已於本月三日

任上訖者始衰而病豈非滿溢之災乞越得杭又過平生之望臣
軾誠惶誠恐頓首頓首伏念臣起自廢黜驟登禁嚴畢命驅馳未
償萬一懷安退縮豈所當然蓋散材不任於斧斤而病馬空縻於
芻粟故求外補以盡餘年豈期避寵而益榮求閑而得劇此蓋伏
遇皇帝陛下剛健中正緝熙光明無爲蓋虞舜之仁篤學有仲尼
之智而臣猥以末技日奉講帷凜然威光近在咫尺惟古人責難
之意每不自量方陛下好問之初遽以疾去推之理數可謂竒窮
荷眷遇之不移竊思榮而愈重雖雨露之施初不擇物而犬馬之
報期於殺身臣無任

二

臣軾言伏奉制書除臣龍圖閣學士知杭州臣已於今月三日到任上訖者入奉禁嚴出膺方面者人臣之殊選在儒者以尤榮臣軾誠惶誠恐頓首頓首伏念臣受寵逾涯積憂成疾既思退就於安養又欲少逃於滿盈仰荷至仁曲從微願江山故國所至如歸父老遺民與臣相問知朝廷輟近侍爲太守蓋聖主視天下如一家鞭扑未施爭訟幾絕臣之厚幸豈易名言此蓋伏遇太皇太后陛下天地之仁賢愚兼取日月之照邪正自分每包函其眷迂欲保全其終始兄弟孤立嘗觀奉於德音死生不核更誓堅於晚節臣無任

杭州謝放罪表二首

臣軾言臣近以法外刺配本州百姓顏章顏益二人上章符罪奉聖旨特放罪者職在承宣當遵三尺之約束事關利害輒從一切之便宜曲荷天慈不從吏議臣軾誠惶誠恐頓首頓首伏念臣早緣剛拙屢致憂虞用之朝廷則逆身之奏形於言施之郡縣則疾惡之心見於政雖知難每以爲戒而臨事不能自回苟非日月之明肝膽必照則臣豈惟獲罪於今日久已見傾於衆言恭惟皇帝陛下睿哲生知清明旁達委任羣下退託於不能憂養成材惟恐

其有過知臣欲去一方之積弊須除一猾以示民特屈憲章以全器使臣敢不省循過咎祇服簡書有此善良自不犯於漢法時有貸捨用益廣於堯仁臣無任

二

亂羣之誅不請而決蓋恩威之無素致奸猾之敢行方俟謹訶豈期寬宥臣軾誠惶誠恐頓首頓首伏以法吏網密蓋出於近年守臣權輕無甚於今日觀祖宗信任之意以州郡責成於人豈有不擇師帥之良但知繩墨之馭若平居僅能守法則緩急何以使民顧臣不才難以議此恭惟太皇太后陛下寬仁從衆信順得天推一身之至公納萬方於無罪而臣始終被遇中外蒙恩請事有專而合宜情無他而可恕故加貸捨以示寵綏朝廷之明粗以臣爲可信吏民自服當不令而率從臣無任

賀明堂赦書表二首

臣軾言宗祀告成修累朝之盛典端門肆青荅萬宇之歡心凡有識知舉增抃躍臣軾誠歡誠喜頓首頓首竊謂祖宗恩信之所被譬如天地寒暑之不差將推作解之仁必在當郊之歲恭惟皇帝陛下憲章六聖左右三靈上帝眷而風雨時壬人去而蠻夷服講明大禮對越昊天懷柔百神嚮用五福大河修復奏軌道於東流

藩邸顧懷錫鴻名於西府臣備員法從待罪守臣想聞路寢之鼓
鐘曾叨奉引嘉與海隅之草木同被恩私臣無任

二

臣軾言嚴配禮成民心知孝好生德洽天下歸仁凡蒙一洗之恩
舉有惟新之喜臣軾誠歡誠抃頓首頓首伏以功存廟社而辭其
禮澤及草木而諱其名此聖人之所難幸微生之親見恭惟太皇
太后陛下勲高任姒道配居虞顧惟致治於和平孰不歸心於保
佑合宮均福畢修累聖之文會慶告成不居先后之位臣職叨禁
從身遠闕庭旣欣渙汗之私溥霑動植更喜謙光之美獨冠古今

臣無任

謝賜歷日詔書表二首

臣軾言伏蒙聖恩特賜臣詔書并元祐五年歷日一卷者論道調
元雖大臣之職授時賦政亦郡守之常而臣供奉內朝使指一道
居則代言而頒命出則勸民以務農蒙此恩榮敢忘奉順臣軾
謝恭惟皇帝陛下文明憲古睿哲先天歷象教民本堯舜之智水
旱罪已蓋禹湯之仁固將推廣其誠心豈特奉行於故事爰因歲
首已宣布於王言孰謂民愚咸識知於帝力臣無任

二

東坡集卷三十一
臣軾言伏蒙聖恩特賜臣詔書并元祐五年曆日一卷者竊惟稽古之君必以授時爲急底日不失日官既有常先時不及時罰在無赦申以丁寧之詔致其惻怛之誠習見頒行止謂有司之故事考其情實則本聖人之用心臣軾中謝恭惟太皇太后陛下元功在天盛德冠古順帝之則雖僉用於恩威與物爲春蓋同歸於仁厚而臣入奉講學出牧農民藜布詔書悉傳閭里庶德音之昭格致嗣歲之豐穰臣無任

賀興龍節表

臣軾言天佑民而作君惟德是輔帝生商而立子有開必先納言壽於方來實兆基於茲日臣軾中賀恭惟皇帝陛下文思天縱聖敬日躋以若稽古之心上遵王路行不恐人之政下酌民言神聽靖共天壽平格臣久塵法從出領郡符奉萬年之觴雖阻陪於下列接千歲之統猶及見於昇平草木之情日月所照臣無任

賀坤成節表

臣軾言仁惟天助壽不假於禱祈澤在民心言自成於雅頌恭臨誕月仰祝聖期雖凡庶之何知亦臣子之常分中謝恭惟太皇太后陛下儲神天地託國祖宗元勳本自於無心神智實生於至靜同守大器於茲六年放億萬之羽毛未若消兵以全赤子飯無數

東坡全集卷三十一
之繼褐豈如散廩以活飢民臣躬領郡符日覩茲事載瞻象闕阻
奉瑤觴嘉與海隅之人同聲華封之祝臣無任

辭免翰林學士承旨狀一首

右臣今月二十八日奉勅已除臣翰林學士承旨左朝奉郎知制
誥詔書到日可依條交割公事訖乘遞馬疾速發來赴闕臣已於
當日依條交割公事訖伏念臣頃以兩目昏暗左臂不仁堅辭禁
林得請便郡庶緣靜退少養衰殘二年于茲一事無補才有限而
難強病不減而益增但以東南連被災傷不敢陳乞別求安便敢
謂仁聖尚賜恩憐召還故官復加新寵不惟朝廷公議未允實亦
衰病勉強不前兼竊觀邸報臣一節轍已除尚書右丞兄居禁林
爲執政在公朝既合迴避於私門實懼滿盈計此誤思必難安處
伏望聖慈除臣一郡以息多言臣見起發前去至宿泗間聽候指
揮謹錄奏聞伏候聖旨

二

右臣近蒙恩除翰林學士承旨臣以衰病不才難居禁近兼以弟
轍忝與執政理合同避奏乞除臣一郡今奉詔書未賜開允恩威
之重需若雷雨豈臣庸陋所敢固違伏念臣自去闕庭日加衰白
故疾不愈舊學已荒更冒寵榮必速顛躓而況清要之地衆所奔

東坡集卷三十三
趨兄弟迭居勢難安處正使緣力辭而獲譴猶賢於忝冒而致灾
伏望聖慈察臣誠懇特賜除臣知楊越陳蔡一郡臣今已到楊州
迺遷前去南京以來聽候指揮干冒天威臣無任戰恐待罪之至
謹錄奏聞伏候勅旨

乞候坤成節上壽訖復遂前請狀

右臣近奏乞依王洙故事罷翰林學士承旨仍乞一郡奉聖旨依
累降指揮不允者銜戴恩慈怵迫威命已經三却其敢固違已於
今月二十九日赴閣門祇受告命訖然臣衰病日加心力難強親
兼之謹愚守不移伏見坤成節在近欲候上壽訖復遂前請勉強
供職庶表見臣子恭順之心逡巡力辭蓋終存典刑分義之守護
錄奏聞謹奏

謝宣召再入學士院表二首

右臣今月十一日翰林待詔梁廸至臣所居奉宣聖旨召臣入院
充學士承旨使星下燭生蓬華之光華天澤勿流失桑榆之枯槁
國有用儒之盛士知稽古之榮伏以翰墨之林號稱內相文章之
外不取他才至於用人可以觀政文武並用或成頗牧之功邪正
雜居至有任文之患惟貴且近故難其人而况金鑾玉堂親被絲
綸之密北扉東閣獨稱年德之高必有異人以齊衆口而臣本緣

東坡集卷三十三
三
衰病出守江湖以一方凋弊之餘當二年水潦之厄戴星而治僅
免流離及瓜而還恍如夢寐交親迎勞都邑聚觀驚華髮之半空
笑丹心之未折宜投閑散以養衰殘豈期過採於虛名復使榮加
於舊物此蓋伏遇皇帝陛下德如乾健明配日中既祖述於堯仁
復躬行於舜孝才難之歎人誦斯言緣先帝之德音收孤臣於散
地言雖直而無罪身愈遠而益親委曲保全始終錄用臣敢不更
磨朽鈍少補涓埃難得者時未有捐軀之會勿欺而犯誓無患失
之心臣無任感天荷聖激切屏營之至謹錄奏謝以聞謹奏

二

右臣今月十一日翰林待詔梁迥至臣所居奉宣聖旨召臣入院
充學士承旨者衰遲無用寵既溢於當年眷待有加恩復隆於晚
節使華臨賁天語丁寧聳里巷之驚觀歎朝廷之用舊伏以禁林
分直法本六人帝語親承舊惟一老不緣各次之先後斷自上心
之簡求冠內朝供奉之班極儒者遭逢之盛凡膺此選宜得異材
而臣本以愚忠累塵器使初無已試之效但有過實之名千里闕
庭二年江海憂深投杼豈無三至之言詔復賜環不待一人之譽
此蓋伏遇太皇太后陛下道無私載公生至明以七年之照臨觀
羣臣之邪正知臣剛褊自用雖有寬饒之狂察臣忠鯁不移庶幾

長孺之守故還舊物益茂新恩臣敢不早夜以思死生不易雖桑榆之景已迫殘年而犬馬之心猶思後效

謝賜對衣金帶馬狀二首

右臣伏蒙聖慈以臣入院特賜衣一對金腰帶一條并魚袋鍍金銀鞍轡馬一匹者漢官三服已分密麗之珍唐監八坊復下權奇之駿拜嘉甚寵省已何功伏念臣受材迂疎賦命寒蹇幼師季路止服緼袍長慕少游欲乘下澤日眩重金之耀神驚四牡之良俛仰自惟周章失次此蓋伏遇皇帝陛下憂勤黎庶寤寐雋賢故損既庫之儲以廣英雄之設致茲辱陋亦被寵光臣敢不求稱于表益鞭其後薄德盛服當戒維鷄之篇強乃安邦庶幾有駟之望臣無任感天荷聖激切屏營之至謹錄奏謝以聞謹奏

二

右臣伏蒙聖慈以臣入院特賜衣一對金腰帶一條并魚袋鍍金銀鞍轡馬一匹者鑠錫金軛示有馳驅之勞寶帶襲衣豈無約束之義上既循名而責實下當因物以責誠伏念臣少則賤貧長而困阨仲卿龍具追晏子之一裘伯厚雞栖陋景公之千駟無功拜賜服寵汗顏顧惟何人膺此異數此蓋伏遇太皇太后陛下躬行慈儉德貫天人約於奉已而侈於養賢嚴於私親而寬於馭眾憐

其朽鈍借以光華臣敢不衣被訓詞服勤鞭箠惟德其物永觀不易之言思馬斯祖更厲無邪之志

笏記二首

臣蒙恩授翰林學士承旨知制誥兼侍讀者出膺闈寄入長禁林皆儒者之極榮豈駑材之所稱此蓋伏遇皇帝陛下法天凝命稽古象賢總攬羣英兼收小器欲效涓塵之報未知糜隕之期臣無任感天荷聖激切屏營之至

二

臣蒙恩授翰林學士承旨知制誥兼侍讀者守無功方期還何幸復玷清華此蓋伏遇太皇太后坤載沉潛母慈均一既陶甄於頑鑛復封植於散材誓卒餘生少圖來效臣無任感天荷聖激切屏營之至

謝兼侍讀表二首

臣軾言今月四日伏奉告命除臣兼侍讀者用非其分寵至若鶩滿溢之憂逡巡莫避臣某誠惶誠恐頓首頓首伏念臣與弟轍同登進士並擢賢科內外分掌於制書先後迭居於翰苑今臣以經史入侍司言行於中轍以承轄立朝替編條於外恭承明詔不許固辭以爲兄弟之同升自是朝廷之盛事承明三人僅比古人大

雅一門無慙舊史人非木石恩重丘山恭惟太皇太后陛下明極照臨憂深付託欲爲社稷之衛莫如臣僕之賢以帝堯之哲而甚畏於壬人以孔子之聖而思見於狷者致茲選擢驟及迂愚臣敢不淬勵初心激昂晚歲誓堅必死之節少報不貲之恩臣無任感天荷聖激切屏營之至謹奉表稱謝以聞臣某誠惶誠恐頓首謹言

二

臣軾言今月四日伏奉告命除臣兼侍讀者叨承新命祇服訓詞

每文已窮舊恩未替臣某誠惶誠恐頓首頓首伏念臣志大而才

短論迂而性剛以自用不同之心處衆人必爭之地不早退縮安能保全是以前三年翰墨之林屢遭飛語再歲江湖之上粗免煩言豈此身愚智之殊蓋所居閑劇之致臣之自處何者爲宜而况講讀之司帷幄最近分章摘句則何以報非常之知因事獻言又必貽前日之患雖仰恃天日之照竇常負冰淵之虞恭惟皇帝陛下大德庇民小心順帝雖天覆地載以聖不可知爲神而日就月將以學而不厭爲智曲收舊物以廣多聞臣敢不職思其憂本無分於中外欲報之德誓不易於死生臣無任感天荷聖激切屏營之至謹奉表稱謝以聞臣某誠惶誠恐頓首頓首謹言

東坡全集卷三十三
謝三伏早休表二首

大火既中三庚云伏炎熹之病貴賤所同忽蒙退食之恩遂失流
金之酷恭惟皇帝陛下仁均動植明燭幽微上有無逸之勤下無
獨賢之歎臣等逢時多暇竊祿安居共揚扇暍之風以安黎庶更
勵飲水之節少荅生成臣等無任仰天荷聖激切屏營之至

二

星火見而金微日方可畏朝氣銳而晝情恩獲少休上既知勞下
皆忘暑恭惟太皇太后陛下勞謙恭已內恕及人雖天地無一物
之私而父母有至誠之愛臣等仰蒙寬假動獲便安未明無顛倒
之衣省循何幸夙退有委蛇之食歌詠而歸臣等無任仰天荷聖
激切屏營之至

謝除龍圖閣學士知潁州表

臣軾言伏蒙聖恩以臣累章乞郡除臣龍圖閣學士知潁州者引
嫌求避顧蒼輿之甚明易職寵行荷新恩之至厚疎愚自省慙悚
交并中謝伏念臣學陋無聞性迂難合受四朝之知遇竊五郡之
蕃宣吳會二年但坐糜於廩祿禁林數月曾未補於絲毫敢冀殊
私復還舊物恭惟太皇太后陛下仁涵動植明燭幽微知臣獨受
於聖知欲使曲全於晚節憐其無用許以少安凡力請八章而後

東坡集卷之三
從使不爲一乞而遽去在臣進退可謂光榮雖老病懷歸已功名
之無望而衷誠思報倘生死之不移臣無任感天荷聖激切屏營
之至謹奉表稱謝以聞

東坡集卷之二十三

表

眉山蘇軾東坡氏著

謝賜對衣金帶馬狀二首

右臣伏蒙聖慈特賜臣對衣一襲金腰帶一條銀鞍轡馬一匹者
錫之上駟敢忘致遠之勞佩以良金無復忘腰之適執鞭請事顧
影知慙恭惟皇帝陛下禹儉中修善文外煥長轡以御卒皆四牡
之良所寶惟賢豈徒三品之貴出捐車服收輯事功而臣衰不待
年寵常過分枯羸之質匪伊垂之而帶有餘斂退之心非敢後也
而馬不進徒堅晚節難報深恩臣無任

二

右臣伏蒙聖慈特賜臣對衣一襲金腰帶一條銀鞍轡馬一匹者
 出笥之珍以旌有德在堦之駟豈及無功而臣首尾四年叨塵三
 錫省躬內疚服竈汗流茶惟太皇太后陛下慈儉自居龍光四達
 德被海宇豈惟一襲之衣恩結華夷何止十圍之帶羣臣在馭六
 轡自調而臣頃以衰羸止求安便奉宣德意庶幾五袴之謚收歛
 壯心無復千里之志更期力報有愧空言臣無任

穎州謝到任表二首

臣賦言伏蒙聖恩除臣龍圖閣學士知穎州臣已於今月二十二
 日到任前者避嫌引疾懇無國士之風揣分知難粗守人臣之節

曲蒙溫詔遂假名邦已見吏民惟知感怍臣蒙中謝伏念臣早緣

多難無意軒裳晚以虛名偶塵侍從雖云時可每與願違既未決
 於歸田故力求於治郡慈母愛子但憐其無能明君知臣終護其
 所短自欣投老漸獲安身此蓋伏遇太皇太后陛下慈儉臨民剛
 柔布政參天地而有信喜怒不陳體冰鏡之無心忠邪自辨致茲
 愚直亦克保全雖任職居官無過人者而見危授命蓋有志焉臣
 無任

二

臣軾言伏蒙聖恩除臣龍圖閣學士知穎州臣已於今月二十二日到任訖者支郡責輕未卽滿盈於小器豐年事簡非徒飽煖於一家覽几席之溪湖雜簿書於魚鳥平生所樂臨老獲從臣某誠惶誠恐頓首頓首伏以汝穎爲州邦畿稱首土風脩於南北人物推於古今賓主俱賢蓋宗資范孟博之舊治文獻相續有晏殊歐陽修之遺風顧臣何人亦與茲選此蓋伏遇皇帝陛下丕承六聖總攬羣英生知仁孝之全學識文武之大謂臣簪履之舊物嘗忝帷幄之近臣奉事七年崎嶇一節意其忠義許國故暫召還察其老病畏人復許補外置之安地養此散材更少勉於桑榆誓不忘於畎畝臣無任

同天節進絹表

伏以大人之德莫得而名萬壽之觴無物可稱前件絹土地所出賦租之餘敢輸向日之誠少備充庭之末

上清儲祥宮成賀德音表二首

臣軾言伏覩九月二十七日德音以上清儲祥宮成減決四京及諸道見禁罪人者靈光下燭慶新宮之落成霽澤旁流洗庶獄之多罪散爲和氣坐致豐年臣某誠歡誠忭頓首頓首臣聞舜禹之心以奉先爲孝本釋老之道以損己爲福田永惟坤作之成每辭

天下之養卑宮何陋大練爲安故能捐萬金之資以成一聖之意
爲國迎祥而國無所費與民祈福而民不知勞鑿輅親臨神靈昭
格觀士女之和會既同其休念囹圄之幽囚或非其罪用孚大號
以達惠心恭惟太皇太后陛下恭儉以仁明哲作則愛惜帑廩不
供浮費之私重慎典刑每存數赦之戒一寬湯網衆識堯心臣以
從官出臨近甸率吏民而拜慶助父老之歡謹永望闕庭實同咫尺
臣無任

二

臣賦言伏觀九月二十七日德音以上清諸祥宮成歲決回京及

諸道見禁罪人者璿館告成神人交慶綸音下霈過故盡除臣某
誠歡誠忭頓首頓首臣聞漢武武通天之臺魏明作凌雲之觀皆
厲民而私已或秘祝以斬年然猶形於詠歌被之金石而況文孫
繼志神母考祥追六聖之心本枝百世均萬方之慶囹圄一空豈
惟洗濯於丹書固已光華於青史恭惟皇帝陛下知人堯哲克已
禹勤積德之宮以文章爲藻飾庇民之厦以仁義爲基扇眷樸斲
之成能亦聖神之餘事臣久參法從夙侍經幃樂石銘詩雖幸執
太吏之筆大圭薦裸不獲踐屬車之塵徒與吏民共茲慶澤臣無
任

東坡集卷三十三
四
賀興龍節表

臣軾言天佑我邦祥開是日山川貢瑞日月增華臣某誠歡誠忭
頓首頓首伏以丕聖所儲有慈愷不爭之寶興情共獻益憂勤無
逸之龜不待禱祠而求自然天人之應恭惟皇帝陛下堯仁舜孝
禹勤湯寬德莫大於好生故以不殺爲神武道莫尊於問學故以
所聞爲高明敷錫庶民嚮用五福臣備員內閣出守近畿雖違咫尺
天威乃身在外而上千萬歲壽此意則同臣無任

賀駕幸太學表二首

臣軾言恭聞十月十五日駕幸太學者輦回原廟既崇廣孝之風
幄次儒宮復示右文之化禮行一日風動四方臣某誠歡誠忭頓

首頓首臣聞五學之臨三代所共蓋天子不敢自聖而盛德必有
達尊在漢永平始舉是禮雖臨雍拜老有先王之規而正坐自講
非人主之事豈如允哲退託不能莫爵伏興意默通於先聖橫經
問難言各盡於諸儒恭惟皇帝陛下文武憲邦聰明齊聖大度同
符於藝祖至仁追配於昭陵爰舉舊章以興盛節臣早塵法從久
侍經幃永矣馳誠想聞合語於東序斐然作頌行觀獻馘於西戎
臣無任

臣軾言恭聞十月十五日皇帝駕幸太學者濟濟多士靈承上帝
之休雍雍在宮服膺文母之教風傳海宇慶溢臣工臣某誠歡誠
忭頓首頓首臣聞學校太平之友而以得士爲實經術致治之具
而以愛民爲心心旣立而具乃行實先充而文斯應永惟坤載之
厚輔成天縱之能惟使文子文孫莫不仁故於先聖先師無所愧
恭惟太皇太后陛下憂深祖構德燕孫謀黃裳之文斧藻萬物青
衿之政長育羣材豈惟鼓舞於士夫實亦光華於史冊臣冒榮滋
久被遇最深外告成功行喜鴟之之豈口修潛德孰知麟趾之風
臣無任

謝賜歷日表二首

迎日推筭雖曰百王之常後天奉時惟我二后之德伏讀詔旨灼
知聖心中謝伏以嗣歲將興舊章畢舉三朝受海內之圖籍七月
陳王業之艱難冬有祁寒知民言之可畏陽居大夏識天道之至
仁故於頒朔之初更下布新之詔恭惟太皇太后陛下視民如子
以國爲家振廩勸分人自忘於艱歲消兵去殺天必報之豐年臣
敢不省事清心貴農時之不奪思患預備期歲計之有餘庶竭微
誠少裨洪造臣無任

東坡集卷二十三
歲頒正朔蓋春秋統始之經郡賜璽書亦漢家寬大之詔實爲合
典豈是空文臣某誠惶誠恐頓首頓首伏以望歲者生民之至情
畏天者人君之大戒所以常言報應而不言時數每奏水旱而不
奏嘉祥上有消復之心下有瘼調之道固資共理同底純熙恭惟
皇帝陛下祇敬三靈憂勤萬宇爲仁一日自然天下之歸教民七
年豈無善人之效臣敢不仰遵堯典寅奉夏時謹隄防溝洫之修
行勞來安定之政庶殫緜力少助至仁臣無任

揚州謝到任表二首

臣賦言伏蒙聖恩除臣知揚州臣已於今月二十六日到任訖者
支郡養痾裁能免咎通都移牧自愧何功屢玷恩榮實深慙汗

某 中謝 伏念臣早緣竊祿稍習治民在先帝日已歷三朝近八年
間復忝四郡平生所願滿足無餘志大才疎信天命而自遂人微
地重恃聖眷以少安恭惟太皇太后陛下子惠萬民器使多士以
謂朝廷之德澤付於郡縣與監司乃眷江淮之間久罹水旱之苦
隣封二浙飢疫相薰積欠十年豐凶皆病臣敢不上推仁聖之意
下盡疲駑之心庶復流亡少寬憂軫臣無任

二

一麾出守方愧媮安十國爲連復膺寵寄恩榮旣溢軫心汗靡寧臣

某中謝伏念臣本以鯁生冒居禁從頃緣多病力求賴尾之行會
未半年復有廣陵之請蓋以魚鳥之質老於江湖之間習與性成
樂居其舊天從民欲許擇所安恭惟皇帝陛下欽明文思剛健純
粹天機默運灼知萬化之情人材竝收各取一長之用如臣衰朽
尚未遐遺命至蹇而祿已盈每懷憂懼志雖大而才不副莫報恩
私臣無任

謝賜卹刑詔書表二首

臣言伏蒙聖恩賜臣欽卹行獄詔書一道者時令舉行雖云故事
天心惻怛本出至誠德既洽於好生民雖死而無憾臣某誠惶誠
懼頓首頓首伏以刻木畫地志士不居鑿石流金平人謂病官軫
聖神之念實爲哀敬之先訓詰丁寧吏民感動恭惟皇帝陛下禹
湯罪已堯舜性仁以不忍人之心行若稽古之政豈止緩獄實期
無刑臣敢不推廣上恩厚風俗於無犯申嚴法意消盜賊於未萌
少假歲時庶空囹圄臣無任

二

暑雨其咨既軫小民之病麥秋已至復虞輕繫之淹祗服訓詞灼
知天意臣某中謝伏以仁聖之德哀矜爲先常內恕以及人故深
居而念遠齋戒處掩則知暴露之勤紵絺裋延不忘屨繼之苦吏

既罔懈民知無究恭惟太皇太后陛下事法祖宗德泰天地凱風
養物散爲扇暘之涼靈雨應時同沾執熱之灌臣敢不盡其哀敬
濟以寬明奉漢律之嚴母令瘦死推慈母之意務在平反庶竭愚
忠少行德意臣無任

賀立皇后表二首

臣軾言伏視制書今月十六日皇后受冊禮成者纘女維莘倪天
之妹事關廟社喜溢人神中賀臣聞三代之興皆有內助二南之

化實本人倫維闕睢正始之風具既醉太平之福民有所恃邦其

永昌恭惟皇帝陛下白誠而明惟睿作聖輯寧夷夏德既茂於治

朝輔順陰陽政兼修於內職既膺大慶益廣至仁下逮海隅夫婦

無有愁歎上符天造日月爲之光明受祿無疆與民同樂臣無任

二

吉日既涓柔儀允正穀珪往聘象服來朝

中賀

臣聞周姜任姒之

賢位非皆極漢陰馬鄧之貴德或有慙盛哉六禮之陳襲此三宮

之慶恭惟太皇太后陛下任付託之重躬保佑之勞公天下不私

其親配宸極必先以德徽音不墜嗣成慈孝之風仁壽無疆坐享

雲來之養臣限以官守不獲躬請闕庭臣無任

賀坤成節表

臣軾言歲復六壬龔嘉祥於太史火流七月紀令節於詩人盡海
宇之含生舉欣榮於茲日臣某中賀臣聞君以民爲心體天用民爲
聰明未有心胼而體不紆民悅而天不應故好生惡殺是爲仁壽
之基捐利與民斯獲豐年之惠恭惟太皇太后陛下恭儉一德勤
勞百爲推天覆地載之心阜成民物盡父教母憐之道誨養臣鄰
共知難報之恩必享無疆之福臣以出守淮海無由躬詣闕庭臣
無任

謝除兵部尚書賜對衣金帶馬狀二首

蒙恩賜臣衣一對金帶一條并魚袋金鍍銀鞍轡馬一匹者感服
在躬無復曳婁之歎各駒出廐遂忘奔走之勞施重邱山身輕亭
末伏念臣少賤而鄙性稚少文衣敝緼袍未嘗有耻乘欵段馬自
以爲安豈意晚年屢膺此寵此蓋伏遇皇帝陛下紹隆景命總攬
羣英無競維人勢已加於九鼎惟德其物恩有重於千金臣敢不
上體眷懷勉思報稱贈繞朝之策愧不能謀振屈原之衣期於自
潔臣無任

二

伏以在笥之珍本出於民力脫驟之賜以結於士心顧臣何人屢
膺此寵伏念臣學本爲已材不適時乘伯厚之車雖云疾惡東公

西之帶愧不能言而二年之間三拜是賜此蓋伏遇太皇太后陛下心存社稷德協天人以長策駕馭四方以盛德藩飾多士故令衰朽猶玷光華豈曰無衣蓋獨求於安吉慨然攬轡敢有志於澄清臣無任

謝兼侍讀表二首

伏奉制書除臣守兵部尚書兼侍讀者重地隆名不擇所付清資厚祿以養不才

中謝

伏念臣以草木之微當天地之澤七典各郡

再入翰林兩除尚書三忝侍讀雖當世之豪傑猶未易居矧如臣之孤危其何能副恭惟皇帝陛下聖神格物文武憲邦重離繼明

何煩燭火之助大厦既構尚求一木之支而臣白首復來力心日

折望西清之帷幄久立徬徨聞長樂之鼓鐘恍如夢寐莫報邱山

之施猶貪頃刻之榮臣無任

二

流汗恩榮再辭莫獲強顏衰朽一節以趨臣職

中謝恭惟先帝復六

卿之名本欲後人識三代之舊古今殊制閑劇異宜武選隸於天官兵政總於樞輔故司馬之職獨省文書而師氏之官職在論說

命臣兼領聖意可知恭惟太皇太后陛下約已裕民忘家憂國知先王之兵必本於道德故以儒臣為七兵知人主之學必通於民

東坡集卷三十三
情故自郡守爲五學而臣迂疎不可強合早緣衰病難以久居終當自効於所長之間或可報恩於未死之日臣無任

進郊祀慶成詩表

伏覩今月十四日郊祀禮成者親奠璧琮始見天地兼陳祖宗六廟之典參用漢唐三代之文夷夏來同人神允荅臣某

中賀 恭惟

皇帝陛下聿追來孝對越在天外修神考之文章內服文母之慈儉四方觀禮日辟宅心雪止風恬驗神祇之來饗雲黃歲美知吉凶之在人臣以藝文入侍帷幄考事而知天意陳詩以達民言雖無足觀亦各其志臣無任瞻天望聖慚懼屏營之至所撰郊祀慶

成詩一首謹繕寫陳表上進以聞

謝除兩職守禮部尙書表二首

伏蒙聖恩除臣端明殿學士兼翰林侍讀學士守禮部尙書者衰年自引久抱此心異數併加實爲非意辭不獲命愧何以堪臣賦

中謝

竊惟以殿命官本緣麟趾之舊因時修廢近正金華之名歷

代所榮於今爲甚自元豐之末官制以來若非身兼數器之人未有名冠兩職之重而況秩宗之任邦禮是司豈臣迂愚所當兼領此蓋伏遇太皇太后陛下憂深社稷慮極安危求忠臣於愚直之中論治道於文字之外知臣難進而易退或非患失之鄙夫故授

以禮樂清閑之司使專於論說琢磨之事此恩難報願輸歲月之勤度已所宜終遂江湖之請臣無任

二

備員西學已愧空疎易職東班尤驚忝冒遂領宗卿之事併爲儒者之榮臣軾中謝始臣之學也以適用爲本而耻空言故其仕也

以及民爲心而慙尸祿乃者屢請治郡兼乞守邊欲及殘年少施實効而有志莫遂負媿何言今乃以文字爲官常語言爲職業下無所見其能否上無所考其幽明循省初心有覩面目故於拜恩之日少陳有益之言孔子曰一言可以興邦而孟子亦曰一正君

而國定昔漢文帝悅張釋之長者之言則以德化民輔成刑措之功而孝景帝入晁錯數術之語則以智馭物馴致七國之禍乃知爲國安危之本祇在聽言得失之間恭惟皇帝陛下卽位以來學如不及問道八年寒暑不廢講讀之官談王而不談霸言義而不言利八年之間指陳至理何啻千萬雖所論不同然其要不出六事一日慈二日儉三日勤四日慎五日誠六日明慈者謂好生惡殺不喜兵刑儉者謂約已費省不傷民財勤者謂躬親庶政不瀟聲色慎者謂畏天法祖不輕人言誠者謂推心待下不用智數明者謂專信君子不雜小人此六者皆先王之陳迹老生之常談

言無新奇人所忽易譬之飲膳則爲穀米羊豕雖非異味而有益於人譬之藥石則爲耆木參苓雖無近効而有益於命若陛下信受此言如御飲膳如服藥石則天人自應福祿難量而臣等所學先王之道亦不爲無補於世若陛下聽而不受受而不信信而不行如聞春禽之聲秋蟲之鳴過耳而已則臣等雖三尺之喙日誦五車之書反不如醫卜執技之流簿書奔走之吏其爲尸素死有餘誅伏望陛下覽臣言少留聖意天下幸甚

謝賜對衣金帶馬狀二首

蒙恩賜衣一對金帶一條并魚袋金鍍銀鞍轡馬一匹服官奠籠響動佩章圍士効牽光生鞞策伏以三賜之重莫隆於車馬五采之貴兼施於衣裳汝必有功服之無斁而臣衰年弱幹固難強於馳驅枯木朽株本不願於文繡寵加意外愧溢顏間此蓋伏遇皇帝陛下因能任官稱物平施操名器以勵士上有誠心正銜勒以馭人下無遺力臣敢不思稱其服益勵厥躬雖愧立朝乏能言之近用猶希辨道輸老智於暮年臣無任

二

蒙恩賜衣一對金帶一條并魚袋金鍍銀鞍轡馬一匹服章在笥賁及衰殘銜勒過庭喜先徒御伏以物生有待天施無窮草木何

知冒慶雲之渥采魚鰕至陋借滄海之榮光雖若可觀終非其有
妻孥相顧驚屢致於匪頒道路竊窺或反增於指目此蓋伏遇太
皇太后陛下聰明齊聖陳錫載周含垢匿瑕而察於求賢卑宮菲
食而侈於養士士豈輕於千里念非其人言有重於兼金當思所
報臣無任

笏記二首

榮兼兩職寵與六卿豈伊衰朽之餘有此遭逢之異此蓋伏遇太
皇太后陛下坤元利正天造無私靡求備於一人將曲成於萬物文
章小技縱有效於涓埃草木微生終難耐於雨露臣無任

二

陞榮祕殿列職西清併此光華付之衰朽此蓋伏遇皇帝陛下剛
健純粹緝熙光明曲搜已棄之材將建無窮之業顧慙淺陋將何
補於盛明惟有朴忠誓不同於生死臣無任

定州謝到任表

兵民專寄本禦侮以折衝疆場久安但坐嘯而畫諾才微祿厚恩
重命輕臣軾

中謝

伏念臣一去闕庭三換符竹坐席未暖召節已

行筋力疲於往來日月逝於道路未經周歲復興兩曹朝廷非不
用臣愚忝自不安位所宜竄逐更昌寵榮此蓋伏遇皇帝陛下離

明正中乾健獨運追述東朝之遺意收此散材眷言西學之舊臣
付之善地致此衰朽尙未棄捐臣敢不勤卹民勞密修邊備苟無
大過以及暮年漸還魚鳥之鄉以畢桑榆之景臣無任

慰正旦表

嗣歲將興雖有作新之慶舊穀既沒其深追遠之思凡在照臨舉
增懷慕臣軾中謝恭惟皇帝陛下道躋堯禹行比騫參方受圖於
三朝明發不寐念御簾於雙日孝思柰何幸寬罔極之哀少副有
生之望臣限以官守不獲躬詣闕庭臣無任

謝賜正旦表

夙頒溫詔寵拜新書吏得承宣民知早晚臣軾中謝臣聞言天道者
有數故閏以正時訓農事者在人則王無罪歲豈獨典常之舊必
存忠利之心恭惟皇帝陛下輔相裁成聰明時憲居德刑於冬夏
意與天同暨聲教於朔南責在臣等敢不時使薄歛思患預防勤
卹鰥孤幸流亡之盡復兼明威惠庶戎夏以皆安臣無任

慰宣仁聖烈皇后山陵禮畢表

恭聞今月七日大行宣仁聖烈太皇太后山陵禮畢者日月有時
義當卽遠雨露旣降思則無窮遙知穆穆之光尙起皇皇之望臣
軾中謝恭惟皇帝陛下道循祖武德契天心大哉孔子之仁泣然

東坡集卷二十三
流滄至矣。頌宗之孝，夢若平生。願寬舜慕之心，少副堯封之祝。臣
限以官守，不獲躬詣闕庭，無任瞻天望聖，激切屏營之至。

慰宣仁聖烈皇后附禮畢表

恭聞今月十七日，宣仁聖烈皇后升附禮畢者，反寢而虞，既盡飾
終之典，宅神于廟，益隆追遠之思。凡在照臨，舉增悲慕。臣軾

中謝

竊以六朝繼聖，命傳家法之餘，二后御簾，高出古人之右。逮此登
配廓然，永懷恭惟。皇帝陛下，奉順母慈，表章坤德，四謚哀榮之詔。
簡策有光，數詩挽餞之音，道塗垂涕，日月云遠。典禮告成，願寬無益
之悲，少副有生之望。臣限以官守，不獲躬詣闕庭，無任瞻天望聖，

激切屏營之至。

謝賜衣襖表

十一月九日翰林醫官王宗古至伏蒙聖慈傳宣存問，賜臣等勅
及初冬衣襖者，齊官三服，已寬卒歲之憂。漢札十行，更佩先春之

暖恩均吏士，聲動華夷。臣軾

中謝

伏以禮著始裘，詩歌無褐，邊陲

更戍本為臣子之常，朔易早寒，特軫聖神之念。惟德二物，豈曰無
衣。恭惟皇帝陛下，廣運聰明，力行恭儉，威風旁振，方戰栗於天驕。
溫詔下融，遂流澌於河凍，既無功而坐食，嘗有愧於解衣，敢不推
廣朝廷之仁，益收凍餒，申嚴祖宗之法，少肅惰媮。唯收汗馬之勞

以解濡鵝之誚臣無任

到惠州謝表

先奉告命落兩職追一官以承義郎知英州軍州事續奉告命責授臣寧遠軍節度副使惠州安置已於今日二日到惠州公叅訖者仁聖曲全本欲畀之民社羣言交擊必將致之死亡尚荷寬恩止投荒服臣軾

中謝

伏念臣性資褊淺學術荒唐但信不移之愚

遂成難赦之咎迹其狂妄久合誅夷方尚口乃窮之時蓋擢髮莫數其罪豈謂天幸得存此生此蓋伏遇皇帝陛下以大有為之資行不忍人之政湯網開其二面舜干舞于兩階念臣奉事有年少加憐愍知臣老死無日不足誅鋤明降德音許全餘息故使應虜之馬猶獲蓋帷殼觶之牛得違刀几臣敢不服膺嚴訓託命至仁洗心自新沒齒無怨但以瘡痍之地魑魅為鄰衰疾交攻無復首邱之望精誠未泯空餘結草之忠臣無任

到昌化軍謝表

今年四月十七日奉被告命責授臣瓊州別駕昌化軍安置臣尋於當月十九日起離惠州至七月二日已至昌化軍訖者竝鬼門而東驚浮瘴海以南遷生無還期死有餘責臣軾

中謝

伏念臣頃緣際會偶竊寵榮曾無毫髮之能而有邱山之罪宜三黜而未已

跨萬里以獨來恩重命輕咎深責淺此蓋伏遇皇帝陛下堯文炳
煥湯德寬仁赫日月之照臨廓天地之覆育譬之蠕動稍賜矜憐
俾就窮途以安餘齒而臣孤老無託瘡痍交攻子孫慟哭於江邊
已爲死別魑魅逢迎於海上寧許生還念報德之何時悼此心之
永已俯伏流涕不知所云臣無任

提舉玉局觀謝表

臣先自昌化軍貶所奉勅移廉州安置又自廉州奉勅授臣舒州
團練副使永州居住今行至英州又奉勅授臣朝奉郎提舉成都
府玉局觀在外州軍任便居住者七年遠謫不自意全萬里生還

適有天幸驟從縲紲復齒縉紳臣軼中謝伏念臣才不逮人性多

忤物剛褊自用可謂小忠猖狂妄行乃蹈大難皆臣自取不敢妄
尤會真人之勃興與萬物而更始而臣獨在幽遠最爲冥頑迨茲
起廢之初倍費生成之力終蒙記錄不遂棄捐此蓋伏遇皇帝陛
下正位龍飛對時虎變神武不殺豈非受命之符清淨無爲坐獲
消兵之福聰明不作邪正自分使臣得同草木之微共霑雷雨之
解臣敢不益堅素守深念往愆沒齒何求不厭飯蔬之陋蓋棺未
已猶懷結草之忠臣無任

慰皇太后上仙表

伏觀正月十四日大行皇太后遺詔者慟發六宮悲懼九土奉諱
哀頌不知所云臣軾中謝大行皇太后德冠三朝化行四海獨決
大策措天下於太山之安退避東朝復明辟爲萬世之法奄終壽
祿莫曉天心恭惟皇帝陛下仁孝自天哀傷過禮惟聖達節豈復
行曾閔之難以民爲心則當法舜禹之大願少寬於追慕庶下荅
於臣民臣以外郡居住不獲奔赴闕庭無任哀痛隕越之至

代普寧王賀冬表四首

七日來復陽旣進而歲功成八風不姦樂已調而君道得惟聖在
御與天同符恭惟皇帝陛下嗣守洪基丕承先志法小毖以求助
期旣醉之太平淵默臨朝順陽道之消長清淨爲治俾物類以耶
蘇受福無疆成功不罕臣猥以暗弱仰荷誨憐敢先百辟之朝以
祝萬年之壽

太皇太后

効五物以觀雲咸知歲美備八能而合樂益驗人和顧茲百樂之
生實助兩宮之慶中賀伏惟太皇太后陛下至誠待物博愛臨民

保佑神孫已致無爲之治守持大業匪居不世之功宜福祿之日
來與天地而同久臣早被恩勤之賜莫知補報之方跪奉玉觴仰
祈增壽

皇太后

陽氣應時驗灰輕而權擁日表如度知歲美而人和慶自宮闈澤
流寰宇中賀伏惟皇太后陛下性服慈儉體安禮儀同太妣之母
周慕塗山之興夏仰推聖子坐底于成功抑指外家共陶于至化
得天人之共助享福祿之無彊臣猥以孱虛夙承教育敢効岡陵
之祝永同葵藿之傾

皇太妃

玉律灰除驗陽微之協應土圭景至迎初日之舒長福祿所鍾宮
闈同慶中賀伏惟皇太妃殿下夙彰懿德早事先朝仁孝外全曲
盡兩宮之養溫文內備下刑九御之風戊對休辰九綴增壽凡記
庇麻之賜不勝頌詠之情

謝御膳表

臣伏蒙聖恩特賜寬假將理今月七日夕在蒙中使臨賜御膳問
其治療之增損督以朝餐之日臣下履淵冰上負芒刺蹄涔雖
小能延兩耀之光寸草何知莫報三春之澤正使豚魚幽陋木石
堅頑亦將激勵忘軀奔走赴職而臣尚有無厭之請敢守不移之
愚在法當誅原情可憫實以負薪之疾積有歲時勿藥之祥恐非
旦夕終願江淮之一郡以安犬馬之餘生尚冀此身未填溝壑期

於異日別効涓埃

代滕達道景靈宮奉安表

衣冠出游魏乎宮闕之盛祖考來格燦然日月之明新禮光前彌
文範後繼以作解之雷雨仍收繪像之子孫聳觀華夷淪浹枯朽
竊以祀無豐疎奈不欲昵自仁率親故同宮而合享惟聖作則實
考古而便今庶民子來五福交應蔚山河之增氣紛嶽瀆以來朝
仙木蟠根五聖既聯於龍袞靈芝擢秀九莖復出於齋房皇帝陛
下舜孝格天堯文冠古損益漢唐之典故潤色祖宗之規摹壽考
萬年永作人神之主本支百世共承宗廟之休臣出守遠方阻觀

盛禮會祠壇下莫覩燁然之光留滯周南竊與命也之嘆

代滕達道湖州謝上表

郡壓五湖城交二水既先世舊居之地亦年少初仕之邦父老經
觀不謂微臣之尚在吏民感涕共知洪造之難酬中謝臣等忠臣
可使死封疆而不能受無根之謗議志士本不求富貴而不能安
有道之賤貧況臣早蒙希世之恩常有捐軀之意豈容曖昧畧不
辨明然疑似之難知實古今之通患漢文帝賢君也而不能信賈
生之屈尹吉甫慈父也而不能雪伯奇之冤此小人譖夫所以得
志而欺天忠臣孝子所以抱恨而入地況臣結累朝之深怨無半

面之先容而訴章朝聞恩詔夕下歷數千載唯臣一人比盜伏遇
皇帝陛下妙物言神睿思作聖謂天藜遠以窮呼而必聞如日之
明雖浸潤而不受念茲七年之阨收之九死之餘臣敢不更勵初
心馴圖後效老當益壯未甘結草之幽途死且不辭尚欲據鞍于
前殿

同天節功德疏表

伏以累聖儲休上天垂祐乃逢純乾之月肇興出震之祥恭惟皇
帝陛下以堯舜生知之資承祖宗積治之慶大有上吉天人之助
已明既醉太平聖賢之福誠備至于臣子之私願是爲草木之微
幸同海表之民共罄封人之祝

上皇帝賀正表

東方發律氣迎萬物之新南向受圖禮勤三朝之始惟聖時憲日
天降康泰惟皇帝陛下文武生知聖神天縱舊邦新命既先啓于
前人大德小心以昭事于上帝臣久塵從橐外領藩符敢傾葵藿
之心仰獻松椿之壽

杭州賀冬表二首

月臨天統首冠于三正氣應黃鍾復來于七日君道浸長陽德光
亨恭惟皇帝陛下清明在躬仁孝徧物垂衣南向天何言而四時

東坡集卷三十三
三五
成問孝西清日將旦而羣陰伏蠻夷奔走年穀順成豈惟四海之
歡心自識三靈之陰贊臣祗膺詔命恪守郡符身雖在於江湖顏
不忘於咫尺敢同率土惟祝後天

二

消長有時候微陽之來復賢愚同慶知君子之彙征德化所加神
人並應恭惟太皇太后陛下睿明天縱慈儉身先振海嶽以不傾
地無私載順陰陽之自化天且不違成功已陋于漢唐論德蓋高
千任姒黃雲可望共沾至治之祥彤史何知莫贊無爲之德臣備
員法從祗役海隅東閣拜童阻陪於百辟南山獻壽徒頌於萬年

上皇帝賀冬表

易稱來復蓋知天地之心禮戒無爲以待陰陽之定恭惟皇帝陛
下堯仁冠古舜孝通神種德兆民躬行文景之儉游心六藝灼知
周孔之情人既和而歲白豐天不違而壽無極臣久緣衰病待罪
江湖莫瞻北極之光但罄南山之祝

上太皇太后賀正表

堯歷授時夏正建統氣迎交泰之會祥應重明之朝恭惟太皇太
后陛下道無能名德博而化天人所助本義易之益謙慈儉不居
得老氏之三寶時逢吉日福集清宮臣職守江湖心馳象魏天威

東坡集卷三十三
三尺想聞清蹕之音，膺壽萬年，遠奉稱觴之慶。

舉黃庭堅自代狀

蒙恩除臣翰林學士，伏見某官黃某孝友之行，追配古人瑰璋之文，妙絕當世，舉以自代，實允公議。

英州謝上表

罪盈義絕，誅九族以猶輕；威震怒行，寘一州而大幸。驚冤方散，感涕徒零。伏念臣草芥賤儒，岷峨冷族，龔堯人之素業，借一第以竊名。雖幼歲勤勞，實學聖人之大道；而終身窮薄，常爲天下之罪人。先帝念臣於衆，怒必死之中；陛下起臣於散官，永棄之地。恩深報

茂，每憂天地之難欺，福眇禍多是亦。古今之罕有，自悲棄物猶欲。願天惟上聖，纂宗廟之圖方。太母聽簾，此之政招延俊乂，登進老成。何期章句之謾才，使掌絲綸之要職。凡一時黜陟進退之衆，皆兩宮威禍賞福之公。旣在代言，敢思逃責。苟不能敷揚上意，尊朝廷于日月之明，則何以聳動四方，鼓號令于雷霆之震。固當昭陳功罰，直喻正邪。豈臣愚敢有於私心。蓋王言不可以匿旨，當今之天奪其魄，但謂守官今日之臣。肆其言期于必戮，賴父母之深憫，免子弟之借誅。罪雖駭於聽聞，怒終歸於寬宥。不獨再生于東市，猶令尸祿于南州。累歲寵榮，固已太過。此時竄責，誠所宜然。瘴

海炎陬去若清涼之地蒼顏素髮誰憐衰暮之年恩重邱山感藏
骨髓此蓋伏遇皇帝陛下智惟天錫行自生知巍巍繼六聖之神
休孜孜盡二宮之孝養深原心迹曲示哀矜臣實何人恩常異衆
在先朝偶脫其誅戮故此日復煩于典刑頑戾如斯生存何向臣
敢不墜臍悔過吞舌知非革再三不改之愆庶萬一善終之望殺
身莫喻敢懷窮困之憂土非輕向界遐荒之俗儻沐先朝之化
永惟結草之忠臣無任

移廉川謝上表

使命遠臨切聞喪膽詔詞溫厚版返驚魂拜望闕庭喜溢顏面不

極泰遇雖物理之常然昔棄今收豈罪餘之敢望伏膺知幸揮涕

無從中謝伏念臣頃以狂愚遽遭譴責荷先帝之厚德寬蕭律之

重誅投彼遐荒幸逃鼎鑊風波萬里歎衰病以何堪烟瘴五年賴

喘息之猶在憐之者謂之已甚嫉之者恨其太輕考圖經止日海

隅覽風土疑非人世食有并日衣無禦冬淒涼百端顛躓萬狀恍

若醉夢已無意于生還豈謂優容許承恩而近徙雖云僥倖實有

蚤緣此蓋伏遇皇帝陛下道本生知性由天縱舊勞于外爰及小

人之依堪家多艱鑒于先帝之德奉聖母之慈訓擇正人而與居

凡有嘉謀出于睿斷憫臣以孤忠援寡察臣以衆忌獲行許以更新

庶使改過天地有造化之大不能使人之再生父母有鞠育之恩
不能全身于必死報期碎首言豈渝心濯于淤泥已有遭逢之便
擴開雲日復觀於變之時此生敢更求榮處世但知緘默臣無任

謝量核永州表

海上囚拘分安死所天邊渙汗詔許生還駐世之魂自招合浦感

恩之淚欲漲溟波

中謝

伏念臣生而愚朴少也艱勤俛偃而行不

知所屈衝衝而活何以爲生言則招尤動常速禍顧已於時齟齬使
人費力保全仁宗之朝早得名神考之朝終見貸謂宜飭躬自省
云惡莫爲而乃肆言元祐之間放意公平之際凡獲不虞之譽宜

任非常之辜過既暴聞衆知不赦先皇帝明罰勅法使萬里以思
譽今天子發政施仁無一夫之失所凡在名籍舉賜洗滌俾離一
海之中復至五嶺之外拜天恩之優厚知聖化之密庸挈是破家
航以一葦蛟鱗潛底風濤不驚遂齊編戶之民不爲異域之鬼視
偕飛走施謝乾坤天日彌高徒極馳心於魏闕鄉關八望尚斯歸
骨於嶺山殘生無與於殺身餘識終同於結草

謝復賜看墳寺表

名書罪籍慚負明時思念私塋特還舊刹九泉受賜荒隴生光伏
念臣早以空疎叨居近密始終無補愚不自量恩禮誤加驟及既

往一被黨人之目上遺先臣之憂舊恩已移沒齒何覲豈謂詔書
一出舊物復還山隴絕芻牧之虞松檟變焦枯之色骨肉感滄里
巷咨嗟伏遇皇帝陛下性仁無私聖孝不匱覽二帝初潛之地動
一夫失所之懷號令所加存歿咸賴臣衰病已久報國之口不長
子孫在前教忠之心未替

徐州賀改元表

祇勤國本已獲順成之年奉若天休更新統始之序慶均夷夏歡
洽神人中謝切以爲政急於愛民改元所以表信非有年無以致
家給人足非盛德無以貽時和歲豐鴻惟徽稱獨冠前代恭惟皇
帝陛下和布治法底修事功闢土而任三農順時而佐五穀天用
眷佑秋常大登蜡通八方之神民足四輔之養乃順休命著爲始
年臣等均被至恩具膺優祿祇奉詔誥更形頌言非特降康已類
商王之福行觀嗣歲復興周室之隆

登州謝宣召赴闕表

仕路崎嶇羣言摧沮雖死生不變乎已況用舍豈累其懷中謝臣
草野微生雕蟲末學昔從仁廟誤蒙拔擢之恩旋至神宗亦荷優
嘉之禮祇合俯身從眾卑論趨時柰何明不自知諫於未信屢遭
尤譴寔自己爲力常勉於苟安悔欲追而何及以此遷延歲月荏

再塵埃望已絕於朝端志必期於老死此蓋皇帝陛下躬成王之
幼穎文母之賢輔成天縱之才訓導日躋之聖斯民多幸神斷至
公凡所有爲稍復用舊況秉節推忠之士將欲甄收而作新立法
之人旋行降黜如臣者擢從遠郡俯屈大邦豈意寒灰之復燃試
其駑馬之再駕每思至此其念尤深敢不云云

杭州賀興龍節表

帝武造周已肇興王之迹日符胙漢實開受命之祥彌月載臨普
天同慶中賀恭惟皇帝陛下體乾剛粹稽古溫文信順尚賢已獲
三靈之助神武不殺益修六聖之仁願承天休永作神主臣叨慶

法從出守郡章身在江湖夢想鈞天之奏心同葵藿遠傾向日之
誠

賀正表二首

獻歲發春天有信於生物盛德在木君無爲而法天嘉與星日陶
至化中賀恭惟皇帝陛下肇修人紀祇畏天明日月運行物被無
私之照雷風鼓舞民知不殺之威有萬斯年惟一厥德臣久塵從
橐出領藩符身寄江湖之間神馳衛仗之下

二

若考箕疇正月爲王極之象玩占羲易三陽爲交泰之期順履春

朝誕膺天祿

中賀

恭惟太皇太后陛下道高載籍恩浹含生進賢

退愚蠻夷率服下賤以貴施舍自平臣出領郡符承宣天澤吏民
鼓舞共瞻崇慶之光海宇駿奔永託坤元之載

賀冬表

消長有時德刑並用慶一陽之來復知萬物之向榮

中賀

恭惟太

皇太后陛下道配皇王化行夷夏以用人而考治忽自正身而刑
家邦何勞五物之占坐知歲美不待八音之奏始驗人和臣率職
海隅馳誠天闕默誦萬年之慶遠同百辟之歡

邇英進讀

漢高祖赦季布唐屈突通不降高祖

軾以謂漢高祖唐高祖皆創業之賢君季布屈突通皆一時之烈
丈夫惟烈丈夫故能以身殉主有死無二惟賢君故能推至公之
心不以私怨殺士此可以為萬世臣主之法

漢宣帝詰責杜延年治郡不進

軾以謂古者賢君用人無內外輕重之異故雖杜延年名卿不免
出為邊吏治效不進則詰責之既進則褒賞之所以歷試人才考
覈事功蓋如此孝宣之治優於孝文者以此也馬周諫唐太宗亦

以爲言治天下者不可不知也

叔孫通不能致二生

軾以謂叔孫通制禮雖不能如三代然亦因時施宜有補於世者魯二生非之其言未必皆當通以謂不知時變亦宜矣然謹按揚子法言昔齊魯有大臣史失其名或曰如何其大也曰叔孫通欲制君臣之儀聘先生於齊魯所不能致者二人由此觀之大臣以道事君不可則止然後可以托六尺之孤寄百里之命若與時上下隨人俛仰雖或適用於一時何足謂之大臣爲社稷之衛哉

狄山論匈奴和親

軾謹按漢制博士秩皆六百石耳然朝廷有大事必與丞相御史九卿列侯同議可否蓋親儒臣尊經術不以小臣而廢其言故狄山得與張湯爭議上前此人臣之所甚難而人主之所欲聞也溫顏以來之虛懷以受之猶恐不敢言又况如武帝作色憑怒致之於死乎故湯之用事至使盜賊半天下而漢室幾亂蓋起於狄山之不容也

文宗訪鄭公後得魏謩

軾觀唐文宗覽正觀事而思魏鄭公之後亦有意於善治矣雖然唐室凌遲未易興起非高才偉人無足以肩之而信訓注之狂謀

幾隕宗社良可歎已至於獎魏暮之極諫願處於無過之地亦賢君之用心也

張九齡不肯用張守珪牛仙客

軾竊謂士大夫砥礪名節正色立朝不務雷同以固祿位非獨人臣之私義乃天下國家所恃以安者也若名節一衰忠信不聞亂亡隨之捷如影響西漢之末敢言者惟王章朱雲二人章死而雲廢則公卿持祿保妻子如張禹孔光之流耳故王莽以斗筭穿窬之才恣取神器如反掌唐開元之末大臣守正不同惟既已忤旨罷相明皇不復聞其過以致祿山之亂治亂之機可不慎

哉

顏真卿守平原以抗祿山

軾以謂古者任人無內外輕重之異故雖漢宣之急賢蕭望之之得君猶更出治民然後大用非獨以歷試人材亦所以維持四方均內外之勢也唐開元天寶間重內輕外當時公卿名臣非以罪責不出守郡雖藩鎮帥守自以為不如寺監之僚佐故郡縣多不得人祿山之亂河北二十四郡一朝降賊獨有一顏真卿而明皇初不識也此重內輕外之弊可以為鑒

漢武帝唐太宗優劣

軾以謂古之賢君知直臣之難得忠言之難聞故生盡其用歿思其言想見其形於夢寐亦可謂樂賢好德之主矣漢武帝雄材大畧不減太宗汲黯之賢過虞世南世南已死太宗思之汲黯尙存武帝厭之故太宗之治幾至刑措而武帝之政盜賊半天下由此也夫



講筵進記

書韓維讀二朝寶訓

秘書監侍講傅堯俞始召赴資善堂對邇英閣堯俞致謝上遣人召荅曰卿以博學參預講筵宜尊所聞以輔不逮堯俞講畢曲

上復遣人宣諭卿講義淵博多所發揮良深嘉歎是日上讀三朝寶訓至天禧中有二人犯罪法當死真宗皇帝惻然憐之曰此等安知法殺之則不忍捨之則無以勵衆乃使人持去笞而遣之以斬訖奏又祀汾陰日見一羊自擲道左恠問之曰今日尙食殺其羔真宗慘然不樂自是不殺羊羔資政殿學士韓維讀畢因奏言此特真宗皇帝小善爾然推是心以及天下則仁不可勝用也真宗自澶淵之役却狄之後十九年不言兵而天下富其源蓋出於此昔孟子論齊王不忍殺觥棘之牛以爲是心足以王今恩足以及禽獸而不及於百姓豈不能哉蓋不爲耳外人皆云皇帝陛

下仁孝發於天性每行見昆蟲螻蟻違而過之且勅左右勿踐履
此亦仁術也臣願陛下推此心以及百姓則天下幸甚某時爲右
史奏曰臣今月十五日待選英閣竊見資政殿學士韓維因讀三
朝寶訓至真宗皇帝好生惡殺因論皇帝陛下在宮中不忍踐履
蟲蟻其言深切可以推明聖德益增福壽臣忝備位右史謹書其
事於冊又錄一本上進意望陛下采覽無忘此心以廣好生之德
臣不任大願



70025364

